



FUNDASAUN FETO HADOMI FAMILI - FFHF

Address Avenida Liberdade da Imprensa Suco Becora.Cristo Rei,Aldeia Maucomate

Email: tinahf@yahoo.com; Tel: (+ 670) 77240512

RELATORIU AUDITORIA SOCIÁL

**“POLÍTICA MINISTÉRIO AGRIKULTURA NO PESKAS NIAN BA
DISTRIBUISAUN TRATORES IHA MUNISIPIU AINARO”**



ELABORA HUSI

**ONG FUNDASAUN FETO HADOMI FAMILIA - FFHF
2018**

Lian Makloke

Ho laran ksolok ami hato'o agradese wain ba Nai Maromak nia matenek ispiritual ne'ebe mak haraik mai ami ekipa ONG FFHF bele finaliza elabora ami nia relatoriu rezultadu auditoria social iha Munisipiu Ainaro ho diak no susesu.

Objetivu husi programa auditoria social ida ne'e mak atu avalia no hare fila fali polítika Ministeriu Agrikultura no Peska (MAP) nian ne'ebe mak implementa ona, li-liu hare ba programa no polítika distribuisaun tratores ba agrikultores sira iha Munisipiu Ainaro no nia impaktu husi polítika ne'e ba benefisiariu sira (Povo).

Rezultadu sira husi auditoria social ida ne'e FFHF sei uza nudar baze referensia ba FFHF hodi halo advokasia ba Governu li-liu ministeriu relevante ba futuru atu hadiak polítika sira iha tempu oin mai nune'e bele hatan ba preokupasaun povo sira nian iha baze.

Aproveita biban ida ne'e lori ONG FFHF nia naran hato'o ami nia agradesementu klean ba Sua exelensia Ministru Agrikultura no Peskas (MAP) oitavu Governu konstituisional no funsionario tomak MAP nian, Prezidente autoridade Munisipiu Ainaro, Diretor serbisu Agrikultura Munisipal Munisipiu Ainaro, Uniaun Europeia, Ekipa konsorsiu The Asia Foundation (TAF) & Forum ONG Timor Leste (FONGTIL), KD-ReNAS, Konsehu Board FONGTIL, Lider komunitariu no pessoal extensionista sira husi suku albu ha'at (Suku Maununu, Leolima, Foho Ailiku, no Casa), ekipa intervistadores sira, membru no voluntariu tomak ONG FFHF nian ba imi nia kontribuisaun no koperasaun tomak ne'ebe ita bo'ot sira fornese durante ne'e nune'e ikus mai bele termina programa auditoria social ne'e ho susesu.

Ami konsiente katak relatoriu ida ne'e sei do'ok husi perfeitu hanesan espektasaun públiku nian tanba ne'e ami nafatin nakloke hodi simu sujestaun no kritikas sira ne'ebe ho objetivu atu hadiak no kualifika relatoriu ida ne'e antes públika ba públiku hodi uza ba nesesidade komum nian.

Dili, 23 de Setembru 2018

Martinha Da silva

Diretora Ezekutivu FFHF

Lista Konteudu

Lian Makloke	2
Lista Konteudu	3
Kapítulu I	
Introdusaun Programa Auditoria Sosiál	
1.1. Introdusaun Auditoria Sosiál	4
1.2. Objetivu Auditoria Sosial	5
1.3. Metodu Auditoria Sosial	5
Kapítulu II	
Analiza Situasionál ba Dezenvolvimentu Agrikultura iha Timor-Leste	
2.1. Situasaun Jeral Agrikultura iha Timor-Leste	7
Kapítulu III	
Deskobrimentu sira iha Auditoria Sosiál ba Servisu Agrikultura	
3.1. Introdusaun	10
3.2. Deskobrimentu sira	10
Kapítulu IV	
Konkluzau no Rekomendasaun sira	
4.1. Konkluzau	28
4.2. Rekomendasaun	28
4.3. Maktaka	29
Referensia	30

Kapítulu I

Introdusaun Programa Auditoria Social

1.1. Introdusaun

Tuir plataforma Governo nian ne'ebe hatur liu husi Planu Estratejia Dezenvolvimentu Nasional hateten katak to'o 2030 Timor Leste tenke iha produsaun aihan ne'ebe suficiente ba konsume no sai nudar aliserse ekonomia povu nian. Politika ida ne'e nudar referénsia ne'ebe kada tinan Ministeriu Agrikultura adopta hodi halo planu dezenvolvimentu setores iha Ministeriu hodi hahu estabese kondisaun sira liu husi asisténsia servisu ne'ebe Governo fasilita hanesan fahe traktor, fahe fini, difini estratéjia implementasaun atividade infrastrutura hanesan halo irrigasaun, DAM no seluk tan. Maibe husi política diak ne'e la alinea ho tékniku implementasaun tanba mosu Sistema Familiarismo (KKN) iha prosesu distribuisaun Tratores ba grupo agrikultor sira (Rezultadu monitorizasaun FFHF no debate plenária PN iha tinan 2013)

Tanba ne'e mak FFHF hanesan organizasaun sociedade civil ida ne'ebe hanesan mos parseiru kritiku Governu nian iha oportunidade ida ne'e hanoin katak auditoria sosial nudar meus diak liu ba sidadaun sira atu halo kontrolu ba implementasaun política governu nian ne'ebe mak implementa ona iha baze nune'e bele garante qualidade no rezultadu servisu ida ne'ebe diak no fo benefisiu ba ema barak. FFHF halao auditoria ida ne'e bazeia ba baze legal konstituisaun RDTL ne'ebe iha artigu 40.1 hatete Sidadaun hotu-hotu iha direitu ba liberdade ba espresaun no direitu atu informa no hetan informasaun ho izensaun, aleinde ne'e (Artigu 48) Sidadaun hotu-hotu iha direitu atu apresenta petisaun, keixa no reklamasan ba órgaun soberanu ka autoridade naran ida atu defende nia direitu ka interese jerál, no mos (Artigu 63.1). Sistema demokrátiku nia kondisaun no meu importante ida maka mane ho feto sira-nia partisipasaun direta no ativa iha vida pulítika. Aleinde ne'e (MdE kona-ba auditoria sosiál 2015). Governu Timor Leste fo espasu ida ba auditoria sosiál iha Governu laran liu hosi Unidade Auditoria Sosiál.

Interpretasaun ba baze legal hirak ne'e katak fo espasu ba kualker sidadaun, grupu ou naran organizasaun ida atu hetan no asesu ba informasaun hotu ne'ebe mak iha liga ba dezenvolvimentu iha kualker seitór.

Organizasaun sosiedade sivil bele halo auditoria sosiál ho objetivu atu tulun Governu no nia benefisiáriu sira (povu). Laiha objetivu atu tau sala ba funsionáriu públiku. Iha objetivu atu avalia dezempeñu husi organizasaun sira hodi hatene karik sira realiza objetivu sosiál, ambientál no komunitáriu”

1.2. Objetivu Auditoria Social

Objetivu husi programa auditoria social ne'ebe FFHF halao ne'e mak hanesan tuir mai ne'e:

1. Atu avalia no monitoriza polítika implementasaun planu desenvolvimentu seitor agrikultura fo duni benefísiu ba comunidade sira nudar nain ba desenvolvimentu.
2. Atu avalia no monitoriza polítika distribuisaun hand trator nune'e buka hatene nia impaktu sira ba povo
3. Atu halo balansu informasaun husi fontes ne'ebe independen hodi tulun Governu foti dezisaun ne'ebe los bazeia ba evidénsia ba politika distribuisaun tratores

1.3. Metode Auditoria Social

a. Sample no respondente

Auditoria social ne'ebe FFHF halao iha Munisipiu Ainaro ne'e kobre postu administrativu rua mak hanesan postu administrativu Ainaro Vila (suku Kassa & Maununu) no postu administrativu Hatu-Udo (Suku Foho Ailiku & Leolima) nune'e total suku amostra hamutuk 4. Respondentes sira mai husi comunidade benefisiariu minimu nain 5, Lideransa komunitariu minimu nain 5 no Ministeriu (Departementu relevante, Extensionista nsst) nian foti sampel hamutuk ema nain 5. Total respondentes iha auditoria social ne'ebe FFHF halao ne'e hamutuk 58.

b. Instrumentu (tools) ne'ebé uza hodi halo auditoria social.

FFHF uzakestionáriu, hodi intervistasistema ne'e fasil liuhodi koleta dados no informasaun husi respondentes sira tanba bele fasilita atu halo adaptasaun ho kondisaun iha terrenu nune'e wainhira mosu iha Fokus group Interview no data Qualitativo.

c. Prosesu koleasaun dados ka informasaun

Prosesu koleasaun hahu ho etapa hirak hanesan tuir mai:

Fokus Group Interview, liu husi aktividade ne'e sei koleta informasaun inísiu husi Komunitade. Mekanizmu **Fokus Grupo interview** hodi halo entrevista ho repondente sirahanesan Komunitade, grupo agrikultur Lideransa komunitária, Autoridade

lokál,extensionsta no Ministériu relevante hodi koleta dados no informasaun hirak ne'ebe relasiona ho asisténsia Ministeriu Agrikultura nian ba Grupo agrikultor sira hodi hasa'e qualidade no kuantidade produsaun

d. Metodu analiza dados ka informasaun

Dados no informasaun ne'ebe koleta ona sei hatama iha baze de dados (data entry) hodi halo prosesamentu no tools ne'ebe sei uza mak **Excel Sheet** tanba fasil liu no ema hotu bele kompriende ho diak konaba dados ne'ebe tama ho nia tipu ne'ebe iha klasifikasaun bazeia ba pergunta ne'ebe tau iha formatu kestionáriu.

Kapítulu II **Analíza Situasionál**

2.1. Dezenvolvimentu Agrikultura iha Timor Leste

Agrikultura nudar baze principal ba ekonomia Timor Leste nomós nu'udar fontes rendimentu moris ema nian. Agrikultura sai nafatin seitór importante ba ekonomia laos husi mina rai iha futuru. Forsa especial husi agrikultura nu'udar baze ba kresimentu imediatu ekonomiku estabelese no dokumentadu ona ho diak. Foin liu dau-daun ba, ekonomia Asia balun halo ona jestaun atu alkansa kresimentu sustentável liu husi investimentu ida konsistensia ba longu prazu iha agrikultura. Relatoriu Dezenvolvimentu Mundial (WDR, 2008) konklui katak iha sékulo 21, agrikultura sei kontinua sai instrumentu vital ba hamenus kiak, kresimentu ekonomiku ne'ebé sustentável, sustentabilidade ambiental ba nasaun ne'ebé depende ba agrikultura nudar baze hanesan Timor Leste.

Rekoñese importânsia husi setór agrikultura, hahu husi ukun rasik a'an guvernu Timor Leste hirak kaer ukun durante ne'e investe ona signifkativamente iha infraestruturá agrikola, irigasaun, makinaria agrikultura, no fornese subsídiu fini, adubu, pestisida, aimoruk, rede kaer ikan, bero ka ró ba kaer ikan no asisténsia ba preparasaun fila rai atu halo to'os ou natar. Embora iha investimentu hirak ne'e, kresimentu produsaun aihan hatudu progresu maibé seidauk akompañia ho balansu iha kresimentu populausaun. Seitór aihan kontinua sai hanesan produsaun aihan ne'ebe la estável no situasaun seguransa aihan no nutrisional uma kain mos sei do'ok husi nivel satisfátoriu.

Tanba ne'e mak kuartu Guvernu Konstituisional ne'ebe lideradu husi sua exelensia Kay Rala Xanana Gusmão produs tiha dokumentu ida ne'ebe hanaran Planu Estratejiku Dezenvolvimentu Nasional (PEDN 2011-2030) ne'ebe ho ambisaun katak to tinan 2030 Timor Leste sei sai nasaun ida ho rendimentu mediu altu no vizualiza auto-sufisiensia iha produsaun aihan prinsipal wainhira tama tinan 2020. Atu vizualiza vizaun husi PEDN 2011-2030 RDTL nian ne'e, Ministeriu Agrikulturano Peskas formula tiha Planu Estratejiku MAP 2014-2020 ne'ebe ho vizaun Setór Agrikultura ne'ebé sustentavel, kompetetivu, no prósperu hodi hamenus kiak no kontribui hadiak kondisaun moris povo nasaun ne'e nian. Iha fulan Outubru 2010, Guvernu Timor-Leste liu husi

Ministériu Agrikultura no Peska, Ministeriu Finansa, Ministeriu Ekonomia no Dezenvolvimentu, Ministeriu Edukasaun, Ministeriu Saude, Ministeriu Solidariedade Sosiál, Representante Nasoens Unidas no Ajensia ONU nian hotu iha Timor-Leste lansa tiha ona deklarasaun ida ho naran **Deklarasaun Comoro** ba *Hakotu Hamlaha no Malnutrisaun iha Timor-Leste*. Iha deklarasaun ne'e Governu no Ajensia Nasoens Unidas nian sira afirma sira nia komitmentu ba kombate hamlaha no reduz malnutrisaun liu husi hasa'e produsaun agrikola ida nakonu ho kualidade no kuantidade hodi bele responde ba nesesidade konsumu iha nivél uma-kain.

Iha deklarasaun ne'e, Governu Timor-Leste no Ajensia ONU nian sira kompromete atu alkansa seguransa ai-han hodi reduz hamlaha husi 50.4% (*Dadus Estatistika 2007*) tu'un ba 25.2% no taxa malnutrisaun husi pursentu 48% (*Sensus 2010*) tu'un ba 24% to'o tinan 2015. Maibé realidade hatudu katak taxa hamlaha kontinua 41.8% (*Sensus Populasaun 2015*) no labarik tinan 5 mai kraik ho raes badak 45.6% no malnutrisaun 29.5% (*Levantamentu DHS 2016*). Ne'e indika katak intermus de polítika ita nia estadu demonstra sira nia komitmentu no vontade hotu atu ultrapasa situasaun ironiku sira ne'ebe mak nasaun nurak ne'e enfrenta maibe pratikamente vizaun no polítika diak hirak ne'e la konsege realiza tuir planu hotu mak hatur ona.

2.2. Dezafiu Sira Iha Seitor Agrikultura

Polítikamente estadu ida ne'e iha ona programa no planu atu dezenvolve seitor agrikultura núdar baze prinsipal ba hasae rendimentu ekonomia iha Timor Leste maibe infelismamente polítika diak hirak ne'e seidak bele lori rezultadu pozitivu ba hadiak situasaun kiak, ekonomia, hamlaha no malnutrisaun iha Timor Leste. Ne'e hotu akontese tanba dezafiu hirak hanesan tuir mai ne'e:

1. Vulnerabilidade ba kondisaun klimátika
2. Utilizasaun teknolojia tradisionál ho produtividade ki'ik
3. Insuficiente ba serbisu hirak ne'ebe iha relasaun atu fo suporta ba agrikultór sira iha area rural (ezemplu; estensaun, insumu/input, komersializasaun, mekanizasaun no seluk tan)
4. Infraestrutur rural seidak diak (ezemplu; estrada, kondisaun irigasaun)
5. Fraku iha orientasaun merkadu (ezemplu; produtor subsistênsia, kuadru presu la hanesan, kustu tranzasaun a'as)

6. Uza pratika agrikultura ne'ebe la sustentável (tesi ai,sunu rai)
7. Investimentu privadu ne'ebe sei menus

Kapítulu III Deskobrimentu sira iha Auditoria Sosiál

3.1. Introdusaun


Iha auditoria sosiál ida ne'e, FFHF halo ba Servisu Agrikultura Munispál Ainaro liuhare'e variavel bo'ot ida hanesan politika distribuisaun hand trator no trator bo'otba sukuha'at (4) hanesan suco Maununu,suku Ailiko,suku Kassa no suku Leolima. Total respondente sira ne'ebé ekipa intervistador sira halo intervista durante programa auditoria sosial ida ne'e hamutuk 58 respondentes ne'ebe kompostu husi lider komunitaria, agrikultor sira no extensionista destakadu iha suco tarjetu. Iha analiza ida ne'e, FFHF halo ho metodu hare'e percentajen husi respondente sira ba pergunta ne'ebé iha questionariu.

3.2. Rezultadu Deskobrimentu Auditoria Social

1. Politika no mekanismu distribuisaun tratores

Iha sub variavel ida ne'e FFHF fokus hare liu konaba politika no mekanismu ne'ebe Guvernu li-liu MAP estabelese hodi distribui trator bo'ot no hand trator ba grupu agrikultores sira iha munisipiu Ainaro.Ba detallu bele hare iha grafiku tuir mai.

Grafiku 1.Persentajen Resposta husi respondents konaba politika no mekanismu distribuisaun tratores ba Agrikultores




Rezultadu Auditoria Social FFHF 2018

Husi grafiku iha leten hatudu katak respondentes hamutuk 52 (89.66 %) mak revela katak mekanismu distribuisaun tratores ba grupu, no respondentes nain 5 (8.62 %) mos hatete katak politika MAP nian ba distribui tratores distribui ba ema individu no uniku respondente 1 (1.72%) mak hatete katak la hatene klean konaba pulitika distribuisaun tratores. Ne'e signifika katak MAP nia politika ba distribuisaun trator diak maibe iha implementasaun la alinea ho saida maka preve ona iha politika ne'e rasik. Razaun seluk mos mak antes distribui trator MAP rasik seidak halo esplikasaun ida ne'ebe mak diak ba agrikultores sira konaba mekanismu, politika no objetivu husi distribuisaun tratores ne'e ba komidade sira.

2. Kriteria Atu hetan tratores

Iha sub variable ida ne'e FFHF mos buka atu hatene diak kriteria ne'ebe mak MAP rasik estabese ba agrikultores sira wainhira atu sai beneficiariu ba tratores ne'ebe mak MAP distribui ona ne'e. Ba detalu ba hare iha grafiku 2 tuir mai.

Grafiku 2. Persentajen respondentes konaba Kriteria atu simu trator bo'ot no hand trator husi MAP



Rezultadu auditoria social FFHF 2018


Rezultadu ne'ebe kontein iha grafiku 2 iha leten demonstra katak husi total respondentes hamutuk 58 no respondentes hamutuk 53 (91.38 %) mak resposta katak kriteria atu simu tratores ne'ebe MAP distribui ne'e distribui ba grupu agrikultores ne'ebe mak eziste ona iha suku hodi halo produsaun no hasae sira nia produsaun, no respondentes hamutuk nain 5 (8.62 %) mak resposta katak sira la hatene kriteria ne'ebe mak MAP estabese ba

agrikultores sira oinsa mak atu benefisia tratores husi MAP.Ne'e signifika katak iha prosesu distribuisaun tratores ba agrikultores sira MAP rasik seidauk halo esplikaun no socializasaun klean ba agrikultores sira konaba objetivu no kriteria sira husi politika ne'e rasik.

3. Mekanismu Distribuisaun tratores

Iha sub variabel ida ne'e FFHF buka atu hatene opiniaun no observaun agrikultores nia konaba mekanismu distribuisaun tratores husi MAP ne'e justu ou la justu tuir kriteria ne'ebe mak MAP rasik estabelese ona ba grupu beneficiariu tratores.Ba detalu bele hare iha grafiku 3 tuir mai.

Grafiku 3. *Persentajen observaun agrikultores ba mekanismu distribuisaun tratores husi MAP*




Rezultadu auditoria social FFHF 2018

Respondentes hamutuk 47 (81.03%) mak revela katak tratores ne'ebe Guvernu liu husi MAP distribui ba grupu agrikultores sira ne'e justu tanba maioria distribui ba agrikultores sira ne'ebe mak involve iha grupu ne'ebe eziste ona iha suku sira no tulun sira hodi hasae sira nia produsaun iha nivel uma kain no grupu,maibe iha mos respondentes nain 7 (18.97%) mak relata katak mekanismu distribuisaun tratores ba agrikultores sira la justu ho razaun tanba tratores ne'ebe MAP distribui ne'e sira rasik seidauk simu mesmu sira iha ona grupu,ida ne'e akontese tanba MAP rasik mos iha limitasaun no orsamentu ba sosa tratores seidauk bele responde hotu ba nesesidade komunidadade ka agrikultores sira nian

4. Importansia Husi Tratores ba Agrikultores sira

Iha sub variabel ida ne'e FFHF buka atu hatene konaba polítika MAP nian atu distribui tratores ba agrikultores sira ne'e utiliza atu halo saida no iha duni vantajen ba sira ka lae. Ba detalu bele hare iha grafiku 4 tuir mai.

Grafiku 4. Persentajen husi respondentes konaba vantajen no importansia utilizasaun tratores husi agrikultores




Rezultadu auditoria social FFHF 2018

Husi grafiku iha leten demonstra katak respondentes hamutuk 58 (100 %) mak revela katak tratores ne'ebe mak MAP distribui ba sira ne'e tulun tebes sira hodi hakma'an sira nia serbisu hodi fila rai no halo serbisu extensaun agrikola iha sira nia to'os no natar ne'ebe mak durante ne'e abandona hela, no mos hasae produsaun iha nivel uma kain no grupu ne'ebe mak sira rasik involve ba. Ne'e signifika katak tratores ne'ebe MAP distribui ba grupu sira ne'e fo duni benefisiu no importante tebes ba grupu sira atu hasae sira nia produsaun hodi garante seguransa aihan no soberania aihan iha Timor Leste.

5. Involvimentu Feto iha grupu ne'ebe benefisia ba tratores

Iha sub variabel ida ne'e FFHF buka atu hatene konaba involvimentu feto sira nian iha grupu sira ne'ebe mak benefisia ona tratores husi MAP hodi hasae sira nia produsaun. Ba detalu bele hare iha grafiku 5 tuir mai.

Grafiku 5. Persentajen resposta respondentes nian konaba involvimentu Feto iha grupu ne'ebe benefisia tratores




Rezultadu auditoria social FFHF 2018

Husi grafiku iha leten demonstra katak respondentes hamutuk 55 (94.83%) mak resposta katak maioria feto sira involve iha grupu sira ne'ebe mak benefisia tratores husi guvernun ne'e hodi hasae sira nia produsaun,ne'e signifika laiha bareira entre feto no mane hodi involve iha seitor agrikultura ba hasae rendimentu familia no uma kain nian, aliende ida ne'e iha mos respondentes hamutuk nain 3 (5.17%) mak relata katak grupu hirak ne'ebe benefisia tratores husi MAP ne'e laiha involvimentu feto iha grupu sira. Ho razaun tanba durante ne'e wainhira sira uza hand tractor hodi fila rai sira sempre hasai osan ba selu tratorista no sosa kombustivel.

6. Grupun ne'ebe Benefisia no utiliza tratores

Iha sub variabel ida ne'e FFHF buka atu hatene grupu no benefisiarius sira ne'ebe mak merese ba benefisia tratores husi MAP. Ba detalu bele hare iha figura 6 tuir mai.

Grafiku 6. Persentajen husi grupu sira ne'ebe benefisia no utiliza tratores husi MAP




Rezultadu auditoria social FFHF 2018

Respondentes hamutuk 54 (93.10) ne'ebe sai tarjetu ba auditoria social ida ne'e resposta katak grupu ne'ebe benefisia ba tratores mak grupu agrikultores, ne'e tanba maioria grupu sira ne'ebe simu tratores husi MAP ne'e maioria involve iha grupu ne'ebe mak estabelese ona iha suku sira, respondentes 1 (1.72%) mak resposta katak grupu ne'ebe benefisia ba tratores mak komunitade, no respondentes hamutuk nain 3 (5.17 %) mak resposta katak tratores ne'ebe MAP distribui ne'e ba ema individu laos ba grupu ho razaun tanba iha individu balun ne'ebe mak benefisia ona tratores husi MAP ne'e laos mai husi grupu.

7. Fatin utilizasaun Trator bo'ot no hand trator

Iha sub variabel ida ne'e FFHF buka atu hatene objetivu utilizasaun hand trator no trator iha fatin ne'ebe deit no bainhira mak agrikultores sira utiliza hodi hasae sira nia produsaun iha nivel uma kain no grupu. Grafiku tuir mai sei demonstra detalu konaba persentajen resposta husi respondentes sira konaba objetivu no fatin ba utiliza tratores.

Grafiku 7. Percentajen resposta respondentes konaba fatin ba utiliza tratores




Rezultadu auditoria social FFHF 2018

Respondentes hamutuk 40 (68.97%) ne'ebe sai respondentes iha auditoria social ida ne'e revela katak tratores ne'ebe sira simu utiliza ba fila sira nia to'os no natar, enkuantu respondentes hamutuk 12 (20.69%) mak relata katak tratores ne'ebe sira simu utiliza ba fila deit natar no respondentes hamutuk nain 6 deit mak revela katak tratores ne'e sira uza hodi halo to'os deit. Bazeia ba rezultadu ida ne'e signifika katak maioria husi respondentes uza duni tratores ne'e ho maximu ba fila to'os no natar no tipu utilizasaun bazeia ba potencialidade rai ne'ebe mak iha sira nia suku. Nune'e mak kauza ba tipu utilizasaun ne'ebe variedade hanesan balun utiliza ba fila to'os deit no balun fali utiliza ba natar.

8. Tempu utilizasaun Tratores Husi Agrikultores

Iha auditoria social ida ne'e mos FFHF buka atu hatene tempu ba utilizasaun tratores husi agrikultores sira hodi fila rai. Resposta husi respondentes sira iha variedade tuir situasaun real ne'ebe mak sira rasik enfrenta iha sira nia tempu tomak. Ba detalu bele hare iha grafiku 8 tuir mai.

Grafiku 8. Persentajen resposta husi respondentes konaba tempu utilizasaun tratores husi agrikultores




Rezultadu auditoria social FFHF 2018

Respondentes hamutuk 28 (48.28%) mak revela katak tratores ne'ebe sira simu husi MAP ne'e sira uza iha tempu bailoron no mos tempu udan maibe iha respondentes hamutuk 20 (34.48%) mak resposta katak sira so uza deit iha tempu udan hodi fila rai enkuantu respondentes hamutuk 10 (17.24%) mak resposta katak tratores ne'e sira uza iha tempu bailoron deit. Iha resposta kada respondentes diferente ne'e kauza husi tipu utilizasaun tanba potencialidade rai ne'ebe sira iha la hanesan, balun iha potencia ba to'os no natar, balun fali potencia deit ba to'os no mos natar deit.

9. Kapasidade Tratores Hodi Fila Rai Kada Tinan

Iha sub variabel ida ne'e FFHF fokus atu hatene kapasidade tratores ba fila rai agrikultores sira nian kada tinan. Persentajen resposta husi respondentes sira iha variedade tuir realidade ne'ebe mak kada agrikultores hasoru iha sira nia atividade operasaun ba uzu tratores. Ba detallu bele hare iha grafiku 9 ne'ebe sei demonstra persentajen resposta husi agrikultores sira.

Grafiku 9. Persentajen resposta husi respondentes konaba kapasidade tratores hodi fila rai kada tinan




Rezultadu Auditoria Social 2018

Husi rezultadu auditoria social ne'ebe FFHF halo ba respondentes hamutuk 22 (37.93%) revela katak kapasidade tratores ba fila rai kada tinan 1-5 hektares,respondentes hamutuk nain 4 (6.90%) resposta katak kapasidade tratores fila rai kada tinan 6-10 hektares,no mos respondentes hamutuk 21 (36.21%) mak resposta katak kada tinan tratores fila rai 11-15 hektares,enkuantu respondentes hamutuk 11 (18.97 %) mak resposta katak kada tinan trator fila rai 16-20 hektares.Ne'e signifika tratores ne'ebe mak MAP distribui ba agrikultores sira ne'e kontribui tebes ba hasae produsaun tanba bele fila rai husi 10-20 hektares kada tinan.

10. Kustu ba Utilizasaun Tratores

Iha sub variabel ida ne'e FFHF mos foka atu hare kustu ne'ebe mak agrikultores sira hasai hodi utiliza tratores wainhira sira utiliza ba fila rai agrikultores sira nian.Persentajen ba resposta husi kada respondentes diferente tuir situasaun real ne'ebe sira hasoru.Ba detalu bele hare iha grafiku 10.

Grafiku 10. Persentajen resposta husi respondentes konaba kustu ne'ebe sira hasai hodi utiliza tratores



Rezultadu Auditoria Social FFHF 2018


Rezultadu auditoria social ne'ebe FFHF halo ba respondentes hamutuk 24 (41.38%) mak revela katak tratores ne'ebe iha wainhira sira uza hodi fila rai sira rasik mak kontribui prepara kombustivel hodi fila rai, enkuantu respondentes hamutuk 34 (58.62%) mak relata katak tratores ne'e sira uza gratuita no la selu. Respondentes hamutuk 24 ne'ebe hatete katak wainhira utiliza tratores prepara kombustivel ne'e ho razaun tanba; Sira laos membru husi grupu ne'ebe mak benefisia tratores tanba ne'e mak sira rasik mak prepara kombustivel hodi fila rai sira nia rai. No respondentes hirak ne'ebe mak resposta katak sira utiliza tratores gratuita tanba sira rasik involve iha grupu ne'ebe mak benefisia ba tratores aliende ne'e tratores ne'ebe sira uza ne'e tratores bo'ot tanba ne'e manutensaun no kombustivel hotu responsabiliza husi Guvernu.

11. Responsabilidade agrikultores nian wainhira utiliza tratores hodi fila rai

Tuir pólitika ne'ebe MAP preve katak tratores ne'ebe mak distribui ona ba agrikultores sira sei halo serbisu fila rai gratuita no kombustivel mos sei responsabiliza husi MAP. Tanba ida ne'e mak iha sub variabel ida ne'e FFHF buka atu hatene implementasaun pólitika ida ne'e iha terenu wainhira tratores hirak ne'e fila comunidade nia rai. Persentajen resposta husi respondentes sira ba questaan ida ne'e diferente entre respondentes ida ho ida seluk.

Grafiku 11 tuir mai sei hatudu detalu percentajen resposta husi respondentes sira konaba responsabilidade agrikultores wainhira utiliza tratores ba fila rai.

Grafiku 11 Percentajen resposta husi respondentes wainhira utiliza tratores ba fila rai




Rezultadu Auditoria Social FFHF 2018

Rezultadu auditoria social ne'ebe FFHF halo ba respondentes hamutuk 54 (93.10%) mak revela katak wainhira sira utiliza tratores hodi fila rai sira mak responsabiliza ba kombustivel, no respondentes hamutuk nain 3 (5.17%) resposta katak wainhira sira utiliza trator sira aluga no respondentes nain 1 (1.72 %) resposta katak wainhira sira utiliza tratores sira sempre selu tratorista. Bazeia ba rezultadu ida ne'e signifika katak politika implementasaun iha terenu la alinea ho politika ne'ebe mak MAP trasa ona ne'ebe ho intensaun atu hakma'an agrikultor kbi'it laek sira no hasae sira nia produsaun.

12. Subsidiu Mina Husi MAP Ba Agrikultores

Tuir politika MAP nian deskreve katak MAP sei fo subsidiu mina ba grupu agrikultores sira hodi utiliza ba fila rai gratuita. Tanba ne'e mak iha sub variabel ida ne'e FFHF sei buka hatene subsidiu mina ne'ebe mak MAP fornese ba grupu agrikultores. Grafiku 12 tuir mai sei demonstra total respondentes no percentajen husi agrikultores konaba subsidiu mina husi MAP.

Grafiku 12 persentajen resposta husi respondentes konaba subsidiu mina husi MAP




Rezultadu Auditoria Social FFHF 2018

Rezultadu ne'ebe kontein iha grafiku iha leten demonstra katak respondentes hamutuk 50 (86.21 %) mak revela katak durante ne'e sira hetan subsidiu mina husi MAP hodi utiliza ba fila sira nia to'os no natar, enkuantu respondentes hamutuk nain 8 (13.79%) mak relata katak durante ne'e sira la hetan subsidiu husi MAP wainhira sira presiza atu uza trator ba fila rai. Ne'e akontese tanba MAP ninia polítika ba distribuisaun kombustivel ba agrikultores sira seidauk diak no MAP rasik seidauk iha estimasaun ida mak klean konaba kuantidade kombustivel ne'ebe mak kada agrikultores sira presiza.

13. Benefisiu Tratores ba Agrikultores sira

Objetivu husi polítika distribuisaun tratores mak atu hakma'an agrikultores sira no fila rai agrikultores sira nian ho kuantidade ne'ebe makas. Iha sub variabel ida ne'e FFHF sei buka atu hatene benefisiu sira husi Tratores ba agrikultores. Grafiku 13 tuir mai sei demonstra persentajen resposta husi respondentes sira konaba benefisiu husi tratores ba agrikultores.

Grafiku 13. Persentajen resposta husi Agrikultores konaba benefisiu husi Tratores ba agrikultores




Rezultadu Auditoria Social FFHF 2018

Rezultadu husi auditoria social ne'ebe FFHF halao ho respondentes hamutuk 58 (100%) sira revela katak tratores (*Trator bo'ot no hand tractor*) ne'ebe mak MAP fornese ba agrikultores sira ne'e fo duni benefisiu ba sira. Ho razaun tanba husi tratores ne'ebe mak MAP fornese ne'e bele tulun agrikultores sira hodi fila rai ho kuantidade bo'ot, hasae produsaun iha nivel uma kain no grupu, hakma'an sira nia serbisu, maksimiza sira nia tempu ba halo serbisu iha to'os no natar.

14. Impaktu husi uza tratores (*Trator bo'ot no hand tractor*)

Espetativa bo'ot husi pólitika MAP nian ba distribuisaun tratores mak atu hasae produsaun agrikultores nune'e bele garante seguransa aihan iha nivel uma kain no komunidadade. Tanba ne'e mak iha sub variabel ida ne'e FFHF buka atu hatene impaktu sira husi uzu tratores ba agrikultores sira. Ba detalu bele hare iha grafiku 14 tuir mai.

Grafiku 14. Persentajen resposta respondentes konaba impaktu husi uza tratores ba agrikultores



Rezultadu Auditoria Social FFHF 2018


Rezultadu auditoria social ne'ebe FFHF halo ba respondentes hamutuk 57 (98.28%) revela katak hafoin de sira utiliza tratores ba halo produsaun agrikola sira nia produsaun aumenta,ne'e signifika katak tratores ne'ebe mak MAP distribui ba agrikultores sira ne'e fo duni benefisiu ne'ebe mak diak ba agrikultores sira hodi hasae sira nia produsaun, no uniku respondentes 1 (1.17%) deit mak resposrta katak hafoin sira utiliza tratores ba halo produsaun agrikola sira nia produsaun menus,ne'e akontese tanba impaktu husi mudansa klima ne'ebe la normal (*elninu no laninu*),dezastre naturais seluk hanesan erozaun,inundasaun,sunu rai nomos atake husi moras no peste sira ba produsaun agrikola agrikultores sira nian.Kauza seluk mos mak impaktu husi polítika Governu nian ne'ebe oras ne'e dau-daun implementa hela programa assistensia social sira hanesan:subsidiu idiozus,veteranus, no mos bolsa da mãe nune'e halo agrikultores barak mak laiha ona vontade atu halo serbisu no dezenvolve seitor agrikultura núdar fontes principal ba rendimentu familia no uma kain.

15. Benefisiu Husi Tratores ba feto no labarik

Prinsipiu fundamentu husi pólitika ba distribuisaun tratores ne'e mak laiha diskriminasaun ba ema hotu bazeia ba sexu, idade, rasa,kor no relijiaun.Tanba ida ne'e mak iha sub variabel ida ne'e FFHF sei buka atu hatene benefisiu sira husi tratores ba

feto no labarik sira. Grafiku 15 tuir mai sei demonstra persentajen husi respondentes sira konaba benefisiu husi tratores ba feto no labarik

Grafiku 15. Persentajen resposta husi respondentes konaba benefisiu tratores ba feto no labarik




Rezultadu Auditoria Social FFHF 2018

Rezultadu auditoria social ne'ebe kontein iha grafiku iha leten demonstra katak total respondentes hamutuk 57 (98.28%) mak revela katak tratores ne'ebe MAP fornese ba agrikultores ne'e fo benefisiu ba feto no labarik sira, ne'e tanba maioria grupu hirak ne'ebe mak benefisia tratores ne'e barak mak kompostu husi feto no labarik sira nia inan aman, enkuantu respondentes 1 (1.72%) deit mak hatete katak tratores ne'ebe MAP distribui ne'e la fo benefisiu ba feto no labarik sira, tanba sira rasik la involve iha grupu sira ne'ebe mak benefisia ba tratores.

16. Impaktu Uza Tratores Ba Rezultadu Produsaun Agrikola

Tratores (*Trator bo'ot no hand tractor*) ne'ebe mak MAP distribui ba agrikultores sira ne'e ho intensaun mak atu hasae produsaun nune'e bele garante seguransa aihan ba uma kain no grupu agrikultores sira. Iha sub variabel ida ne'e FFHF sei buka atu hatene impaktu husi uza tratores ba hasae rezultadu produsaun. Ba detalu bele hare iha grafiku 16 tuir mai ne'e.

Grafiku 16. Persentajen resposta husi respondentes konaba impaktu husi uza tratores ba produsaun agrikola




Rezultadu Auditoria Social FFHF 2018

Husi grafiku iha leten demonstra katak respondentes hamutuk 27 (46.55%) mak informa katak husi utiliza tratores ne'e rezulta sira nia produsaun sae makas, no respondentes hamutuk 27 (46.55%) mos informa katak sira nia produsaun aumenta, ne'e signifika tratores ne'ebe mak MAP fornese ba agrikultores sira ne'e fo duni impaktu pozitivu ba agrikultores sira hodi hasae sira nia produsaun iha nivel uma kain no grupu, enkuantu respondentes hamutuk 4 (6.90%) mak revela katak hafoin utiliza tratores ba halo produsaun agrikola sira nia produsaun aumenta oituan deit.

17. Rendimentu Familia nian hafoin utiliza Tratores ba fila rai

Objetivu husi planu estratejiku MAP nian 2014-2020 ida mak atu hadiak rendimentu rural no uma kain, no hamenus moris kiak. Estratejia atu atinji objetivu ida ne'e mak MAP halo ona esforsu ida mak liu husi distribuisaun tratores ba agrikultores sira hodi hadia sira nia rendimentu iha nivel uma kain. Tanba ida ne'e mak iha sub variabel ida ne'e FFHF buka atu hatene impaktu husi distribuisaun tratores ba rendimentu familia. Grafiku tuir mai sei hatudu persentajen respondentes nian ba rendimentu familia hafoin utiliza tratores.

Grafiku17. Persentajen impaktu husi utiliza tratores ba hasae rendimentu familia




Rezultadu Auditoria Social FFHF 2018

Rezultadu husi auditoria social ne'ebe FFHF halo ba respondentes sira hodi hatene impaktu husi utiliza tratores ba hasae rendimentu uma kain nian, mak respondentes hamutuk 57 (98.28%) revela katak hafoin utiliza tratores ba fila rai sira nia rendimentu iha uma kain aumenta tanba ho tratores ne'ebe MAP distribui bele tulun sira halo to'os no natar ho kuantidade bo'ot no mos hasae produsaun agrikola nune'e husi rezultadu hirak ne'e aliende sira konsumu sira mos fa'an hodi sustenta no aseguara ekonomia uma kain, enkuantu respondentes 1 (1.72%) mak hatete katak rendimentu nafatin deit entre uza tratores no la uza tratores iha sistema produsaun agrikola.

18. Sentimentu Agrikultores Hafoin Simu Tratores

Politika distribuisaun tratores husi MAP ba grupu agrikultores sira hanesan meius ida ne'ebe tulun agrikultores sira hodi hakma'an sira nia serbisu no halo intensifikasaun no ekstensifikasaun ba rai potensia hirak ne'ebe mak seidauk utiliza husi agrikultores sira ba produsaun agrikola. Grafiku tuir mai sei demonstra persentajen resposta husi respondentes sira konaba nivel satisfasaun sira nian hafoin simu tratores husi MAP.

Grafiku18. Persentajen resposta husi respondentes sira konaba nivel satisfasaun hafoin simu tratores



Rezultadu Auditoria Social FFHF 2018

Grafiku iha leten demonstra katak respondentes hamutuk 55 (94.83%) revela katak hafoin sira simu tratores husi MAP sira sente kontente tanba ho apoio ne'ebe Guvernu fornese ne'e bele hakma'an sira nia serbisu no tulun sira atu bele halo produsaun ho kuantidade barak liu tan, aliende ne'e iha respondentes nain 2 (3.45%) mos informa katak sira sente tauk wainhira simu tratores tanba seidauk iha koñesementu diak ba tekniku operasaun tratores ne'ebe mak MAP oferese ne'e, enkuantu respondentes nain 1 (1.72%) mak resposta katak hafoin simu tratores sente duvida tanba menus koñesementu ba utiliza tratores.

Kapítulu IV

Konkluzau no Rekomendasaun

4.1. Konkluzau

Bazeia ba rezultadu deskobrimentu husi auditoria social ne'ebe FFHF hetan durante asesmentu iha kampu konaba polítika Guvernu RDTL li-liu Ministeriu Agrikultura nian sobre distribuisaun hand tratores ba agrikultores sira iha Munisipiu Ainaro postu administrativu Ainaro Vila no Postu administrativu Hatu-Udo mak ikus mai konklui katak:

1. Polítika Ministeriu Agrikultura no Peskas (MAP) nian konaba distribuisaun tratores fo duni impaktu pozitivu ba agrikultores sira tanba liu husi tratores ne'ebe mak MAP distribui ne'e bele ajuda hakma'an sira nia serbisu, hasae rendimentu ekonomia familia, rezultadu produsaun kada tinan aumenta, intensifika no extensifika utiliza rai produtivu hirak ne'ebe mak abandonadu;
2. MAP nia Polítika ba forneseментu mina (*subsidiu mina*) ba agrikultores ladun klaru no laiha estimasaun ida mak klaru nune'e kauza ba agrikultores balun la hetan subsidiu mina husi MAP wainhira tempu fila rai;
3. Kuantidade tratores ne'ebe mak MAP atribui iha Munisipiu Ainaro (Postu administrativu Ainaro Vila & Hatu-Udo) seidauk sufisiente ba agrikultores sira hotu, nune'e kauza ba agrikultores balun la asesu ba tratores refere ikus mai implika ba sira tenki selu wainhira fila rai nune'e *transforma polítika fila rai gratuita sai polítika fila rai la gratuita*;
4. MAP nia kontrolu ba tratores hirak ne'ebe mak atribui ona ba suku sira seidauk masimu nune'e fo espasu ba tratorista sira hodi politiza polítika fila rai gratuita no subsidiu ba mina sira sai fali la gratuita
5. Rezultadu auditoria social ne'ebe FFHF implementa iha Munisipiu Ainaro ne'e bele fo espasu ba parte interesada sira hasoru malu (Guvernu, Komunidade no autoridade lokal) hodi halo avaliasaun ba impaktu husi polítika guvernu nian ba benefisiariu sira nune'e bele hadiak iha futuru.

5.2. Rekomendasaun

Bazeia ba deskobrimetus hotu ne'ebe hetan iha auditoria social ida ne'e mak ikus mai hamosu rekomendasaun hirak hanesan tuir mai ne'e;

1. Husu ba Governu atu prepara armazen iha suku sira hodi bele asegura produitu(*Jeral*);
2. Husu ba Governu atu halo manutensaun ba hand tractor no trator ne'ebe hetan problema wainhira fila rai komidade nian;
3. Husu ba Governu atu aumenta tan kuantidade tratores no hand tratores ba suku ha'at ne'ebe FFHF halo auditoria ba;
4. Rekomenda ba Governu atu hadiak kondisaun irigasaun ba natar sira ne'ebe mak agora dau-daun avaria(*Jeral*);
5. Rekomenda ba Governu atu koloka tekniku besik iha suku sira nune'e bele halo atendentu no manutensaun ba tratores wainhira hetan problema;
6. Husu ba Governu atu kontinua fo subsidiu fini ba grupu agrikultores iha suku sira(*Jeral*);
7. Rekomenda ba Governu atu muda sistema distribuisaun tratores ba grupu agrikultores sira;
8. MAP presiza halo socializasaun ba agrikultores no grupu beneficiariu tratores no hand tratores konaba regulamentu utiliza tratores no hand tratores iha suku sira;

5.3. Mak Taka

Ida ne'e mak Fundasaun Feto Hadomi Familia-FFHF nia relatoriu programa auditoria social ne'ebe halao iha Munisipiu Ainaro postu administrativu Ainaro vila no Hatu-Udu konaba polítika distribuisaun tratores ba grupu agrikultores iha suku Kasa, Maununu, Foho Ailiku no Leolima. Fiar katak rezultadu deskobrimetus hirak ne'ebe FFHF deskobre no formula ona iha relatoriu ida ne'e bele sai nudar baze referensia ba Guvernu hodi utiliza ba formula polítika ministeriu nian ida ne'ebe mak adekua nune'e bele koresponde ba nesesidade agrikultores iha suku hirak ne'e iha futuru.

REFERENSIA

Konsellu Nasionál ba Siguransa, Soberania no Nutrisaun iha Timor Leste (KONSSANTIL).2014.*Planu Asaun ba Hakotu Hamlaha no Malnutrisaun iha Timor Leste*

Ministério Agrikultura e Peskas.2012. *Planu Estratéjiku Ministério Agrikultura e Peskas 2014-2020*

República Demokrátika De Timor Leste, Ministério Agrikultura e Peskas.2013. *Política Fini Nasiona Timor Leste*

República Demokrátika De Timor Leste.2014.*Política Nasiona ba Siguransa Ai-haan No Nutrisaun*